

金

史

一



百衲本二十四史

金史

四部叢刊史部

上海涵芬樓借北平國
書館藏元至正刊本景
印闕卷以涵芬樓藏元
覆本配補原書板高營
造尺七寸寬五寸一分

表

儀同三司上柱國錄軍國重事中書右丞相監修

經筵事提調太醫院廣惠司事臣阿魯圖言

竊惟漢高帝入關任蕭何而收秦籍唐太宗即祚命魏徵以作隋書蓋曆數歸

真主之朝而簡編載前代之事國可滅史不可滅善吾師惡亦吾師矧夫典故之源流章程之沿革不披往牒曷蓄前聞維此金源起於海裔以滿萬之衆橫行天下不十年之以專制域中其用兵也如縱燎而乘風其得國也若置郵而傳令及燭興於禮樂乃煥有乎聲明嘗

循初而汔終因考功而論德非武元之英略不足以開
九帝之業非大定之仁政不足以固百年之基天會有
吞四海之勢而未有壹四海之規明昌能成一代之制
而亦能壞一代之法海陵無道自取覆敗宣宗輕動曷
濟中興迨夫浚郊多壘之秋汝水飛煙之日天人屬望
久有在矣君臣守義蓋足取焉我

太祖法天啓運聖武皇帝以有名之師而釋奕世之愾以
無敵之仁而收兆民之心勁卒擣居庸關北拊其背
大軍出紫荆口南搤其吭

指顧可成於雋功

操縱莫窺於

廟筭懲彼取遼之慕容其涉河以遷

太宗英文皇帝席卷雲朔而徇地并營囊括趙代而傳檄
齊魯滅夏國以蹴秦鞏通宋人以偪河淮

睿宗仁聖景襄皇帝冒萬險出饒風長驅平陸戰三峯乘
大雪遂定中原

太陽出而燭火燄

正音作而衆樂廢爰及

世祖聖德神功文武皇帝

恢弘至化勞來遺黎

燕地定都撤武靈之舊址遼陽建省撫肅慎之故墟于
時張柔歸金史於其先王鶚輯金事於其後是以纂修
之命見諸

敷遺之謀延祐申舉而未遑天曆推行而弗竟臣阿魯圖
誠惶誠懼頓首頓首欽惟

皇帝陛下緝熙

聖學

紹述

先猷當

邦家間暇之時

治經史討論之務念彼泰和以來之事蹟涉我

聖代初興之歲年

太祖受帝號於丙寅先五載而朱鳳應

世皇毓聖質於乙亥蚤一歲而黃河清若此

貞符昭然

成命第以變故多而舊史闕者艾沒而新說訛弗折衷於

大朝恐失真於他日於是

聖心獨斷盛事力行

申命臣阿魯圖以中書右丞相臣別兒怯不花以中書
左丞相領三史事臣脫脫以前中書右丞相仍都總裁

臣御史大夫帖睦爾達世臣中書平章政事賀惟一臣
翰林學士承旨張起巖臣翰林學士歐陽玄臣治書侍
御史李好文臣禮部尚書王沂臣崇文太監楊宗瑞爲
總裁官臣江西湖東道肅政廉訪使沙剌班臣江西湖
東道肅政廉訪副使王理臣翰林待制伯顏臣國子博
士費著臣祕書監著作郎趙時敏臣太常博士商企翁
爲史官集衆技以責成書佇
奏篇以

覽近監臣阿魯圖仰承

隆委俯竭微勞紬石室之文誠乏司馬遷之作獻金鏡

之錄願摠張相國之忠謹撰述本紀十九卷志三十九
卷表四卷列傳七十三卷目錄二卷裝潢成一百三十
七帙隨表以

聞上塵

天覽無任慚愧戰汗屏營之至臣阿魯圖誠惶誠懼頓
首頓首謹言

奉天行在處所禮部尚書事兼管國子監事臣阿魯圖表

修史官負

領三史事

開府儀同三司柱國錄軍國重事中書左丞相兼修國史領經筵事臣阿魯圖

開府儀同三司上柱國錄軍國重事中書左丞相領經筵事臣別兒怯不花

都總裁

開府儀同三司柱國錄軍國重事中書左丞相兼修國史領經筵事臣脫脫

總裁官

銀青榮祿大夫御史大夫知經筵事臣帖睦爾達世

光祿大夫中書平章政事知經筵事臣賀惟一

翰林學士承旨榮祿大夫知制誥兼修國史臣張起巖

翰林學士資善大夫知制誥同修國史臣歐陽玄

翰林待講學士奉大夫知制誥同修國史同知經筵事臣揭傒斯

嘉議大夫治書侍御史臣李好文

正議大夫崇文太監檢校書籍事臣楊宗瑞

中大夫禮部尚書臣王沂

纂修官

江西湖東道肅政廉訪使臣沙剌班

江西湖東道肅政廉訪副使臣王理

翰林待制奉議大夫兼國史院編修官臣伯顏

奉訓大夫監察御史臣趙時敏

奉訓大夫國子博士臣費著
承務郎太常博士臣商企翁

提調官

榮祿大夫中書平章政事知經筵事臣伯顏

榮祿大夫中書右丞知經筵事臣達世帖睦爾

資德大夫中書左丞臣董守簡

中奉大夫叅議中書省事臣鎖南班

嘉議大夫叅議中書省事臣蠻子

亞中大夫叅議中書省事臣丁元

奉議大夫右司郎中臣老老

承德郎右司郎中臣陳思謙

中順大夫左司郎中臣蠻子

亞中大夫左司郎中臣何執禮

奉訓大夫左司員外郎臣詹赤

奉訓大夫左司都事臣趙公諫

朝請大夫吏部尚書臣拜住

通議大夫兵部尚書臣李獻

正議大夫戶部尚書臣秦從龍

正議大夫工部尚書臣路希賢

朝散大夫禮部侍郎臣靳義

亞中大夫刑部郎中臣顧恕

通議大夫僉太常禮儀院事臣杜秉彝

文林郎翰林國史院都事臣趙中

皇帝聖旨裏江浙等處行中書省至正五年六月二十六日准

中書省咨至正五年四月十三日篤怜帖木兒怯
薛第二日沙嶺納鉢

幹脫裏有時分速古兒赤雅普化云都赤撒迪里迷
失殿中撒馬給事中也先不先等有來阿魯禿右
丞相帖木兒塔失大夫太平院使伯顏平章達世
帖木兒右丞等奏去歲教纂修遼金宋三代史書
即目遼金史書纂修了有如今將這史書令江浙
江西二省開板就彼有的學校錢內就用疾早教
各印造一百部來呵怎生奏呵奉

聖旨那般者欽此咨請欽依施行仍令行省委自文資正
官首領官各一員欽依提調疾早印造完備起解
准此本省咨委叅知政事秦中奉左右司都事徐
槃承德欽依提調及下江浙儒司委自提舉班惟
志奉政校正字畫杭州路委文資正官首領官提
調錢梓印造裝楷

至正五年九月

日

都

事

承務郎江浙等處行中書省左右司都事臣馬黑麻

承德郎江浙等處行中書省左右司都事臣徐槃

奉政大夫江浙等處行中書省左右司員外郎臣鄭璠

奉訓大夫江浙等處行中書省左右司員外郎臣赫德公

奉直大夫江浙等處行中書省左右司郎中臣崔敬

朝列大夫江浙等處行中書省左右司郎中臣島刺沙

中奉大夫江浙等處行中書省叅知政事臣秦從德

資德大夫江浙等處行中書省叅知政事臣沙班

資善大夫江浙等處行中書省左丞臣李家奴

資政大夫江浙等處行中書省右丞臣忽都不花

平章政事

榮祿大夫江浙等處行中書省平章政事臣卜只兒

金華光祿奏江浙等處行中書省左丞相領行臺院事提調江浙財賦都總管府事臣朵兒只

金史目錄上

本紀十九卷

第一

金史一

世紀

第二

金史二

太祖

第三

金史三

太宗

第四

金史四

熙宗

第五

金史五

海陵

第六

金史六

世宗上

第七

金史七

世宗中

第八

金史八

世宗下

第九

金史九

章宗一

第十

金史十

章宗二

第十一

金史十一

章宗三

第十二

金史十二

章宗四

第十三

金史十三

衛紹王

第十四

金史十四

宣宗上

第十五

金史十五

宣宗中

第十六

金史十六

宣宗下

第十七

金史十七

哀宗上

第十八

金史十八

哀宗下

第十九

金史十九

世紀補

志三十九卷

第一

金史二十

天文

第二

金史二十一

曆上

第三

金史二十二

曆下

第四

金史二十三

五行

第五

金史二十四

地理上

第六

金史二十五

地理中

第七

金史二十六

地理下

第八

金史二十七

河渠

第九

金史二十八

禮一

第十

金史二十九

禮二

第十一

金史三十

禮三

第十二

金史三十一

禮四

第十三

金史三十二

禮五

第十四

金史三十三

禮六

第十五

金史三十四

禮七

第十六

金史三十五

禮八

第十七

金史三十六

禮九

第十八

金史三十七

禮十

第十九

金史三十八

禮十一

第二十

金史三十九

樂上

第二十一

金史四十

樂下

第二十二

金史四十一

儀衛上

第二十三

金史四十二

儀衛下

第二十四

金史四十三

輿服

第二十五

金史四十四

兵

第二十六

金史四十五

刑

第二十七

金史四十六

食貨一

第二十八

金史四十七

食貨二

第二十九

金史四十八

食貨三

第三十

金史四十九

食貨四

第三十一

金史五十

食貨五

第三十二

金史五十一

選舉一

第三十三

金史五十二

選舉二

第三十四

金史五十三

選舉三

第三十五

金史五十四

選舉四

第三十六

金史五十五

百官一

第三十七

金史五十六

百官二

第三十八

金史五十七

百官三

第三十九

金史五十八

百官四

表四卷

第一

金史五十九

宗室表

第二

金史六十

交聘上

第三

金史六十一

交聘中

第四

金史六十二

交聘下

列傳七十三卷

第一

金史六十三

后妃上

始祖明懿皇后

德帝思皇后

安帝節皇后

獻祖恭靖皇后

昭祖威順皇后

景祖昭肅皇后

世祖簡翼皇后

肅宗靖宣皇后

穆宗貞惠皇后

康宗敬僖皇后

太祖聖穆皇后

太祖光懿皇后

太祖欽憲皇后

太祖宣獻皇后

太祖崇妃蕭氏

太宗欽仁皇后

熙宗悼平皇后

海陵嫡母徒單氏

海陵母大氏

海陵后徒單氏

海陵諸嬖

第二

金史六十四

后妃下

睿宗欽慈皇后

睿宗貞懿皇后

世宗昭德皇后

世宗元妃張氏

世宗元妃李氏

顯宗孝懿皇后

顯宗昭聖皇后

章宗欽懷皇后

章宗元妃李氏

衛紹王后徒單氏

宣宗皇后王氏

宣宗明惠皇后

哀宗徒單皇后

第三

金史六十五

始祖以下諸子

始祖子幹魯

德帝子輩魯

安帝子謝庫德

孫拔達

謝夷保

子益納

謝里忽

獻祖六子

昭祖子烏古出

跋黑

玄孫崇成

本名僕灰

景祖子劾孫

子蒲家奴

麻頗

子謾都

謾都訶

世祖子幹帶

幹賽

子宗永

幹者 孫璋

昂 本名吳都子鄭家

第四

金史六十六

始祖以下諸子

穆宗子勗

本名烏也子宗秀

康宗子隈可

宗室胡十門

合住 子布輝

搦保

震 本名醜漢

齊 本名掃合

朮魯

胡石改

宗賢 本名阿魯

撻懶

卞 本名吾魯

膏 本名阿里刺

奔 本名三寶

百六十四
金史六十七
九
方

阿喜

第五

金史六十七

石顯

桓赦 弟散達

烏春

溫敦蒲刺附

臘醅 弟麻產

鈍恩

留可

阿疎

奚王回鹘保

第六

金史六十八

歡都

子謀演

冶訶 子阿魯補

骨赦

訛古乃

蒲查

第七

金史六十九

太祖諸子

宗雋

本名訛魯觀

宗傑

本名木里也

宗強

本名阿魯

爽

本名阿鄰

可喜

阿瑣

宗敏

本名阿魯補

元

第八

金史七十

撒改

宗憲

本名阿懶

習不失

宗亨

本名塔不也

宗賢

本名賽里

石土門

忠 本名迪古乃

習室

思敬 本名撒改



錄下

金史七十一

幹魯

幹魯古勃堇

婆廬火

吾札忽

閤母

宗叙 本名德壽

第十

金史七十二

婁室

活女

謀衍

仲 本名石古乃

海里

銀术可

穀英 本名撻懶

麻吉 子沃側

拔里速

習古乃

第十一

金史七十三

阿里合懃

晏 本名幹論

宗尹 本名阿里罕

宗寧 本名阿土古

宗道 本名八十

宗雄 本名謀良虎

阿鄰

按荅海

希尹 本名谷神

守貞 本名左廩

守能 本名胡刺

第十二

金史七十四

宗翰

本名粘罕
子斜哥

宗望

本名幹离不
子齊京文

第十三

金史七十五

盧彥倫

子贊孫亨嗣

毛子廉

李三錫

孔敬宗

李師夔

沈璋

左企弓

虞仲文

曹勇義康
公弼附

左泌

弟綏姪光慶

第十四

金史七十六

太宗諸子

宗磐

本名蒲盧虎

宗固

本名胡魯

宗本

本名阿魯蕭玉附

杲

本名斜也

宗義

本名字吉

宗幹

本名幹本

充

本名神土德子檀奴等

永元

本名元奴

宛

本名梧桐

襄

本名永慶

袞

本名蒲甲

第十五

金史七十七

宗弼

本名兀术

亨

本名字迭

張邦昌

劉豫

撻懶

第十六

金史七十八

劉彥宗

劉萼

劉萼

劉仲誨

劉頰

時立愛

韓企先

子鐸

第十七

金史七十九

酈瓊

李成

孔彥舟

徐文

施宜生

張中孚

張中彥

字文虛中

王倫

第十八

金史八十

熙宗二子

濟安

道濟

斜卯阿里

突合速

烏延蒲盧渾

赤盞暉

大臭

本名塔不也

磐

本名蒲速越

阿里補

子方

第十九

金史八十一

鶻謀琶

迪古迭

阿徒罕

夾谷謝奴

阿勒根沒都魯

黃摑敵古本

蒲察胡蓋

夾谷吾里補

王伯龍

高彪

溫迪罕蒲里特

伯德特里補

耶律懷義

蕭王家奴

田灝

趙賊

第二十

金史八十二

郭藥師

子安國

耶律塗山

烏延胡里改

烏延吾里補

蕭恭

完顏習不主

紇石烈胡剌

耶律恕

郭企忠

烏孫訛論

顏蓋門都

僕散渾垣

鄭建元

烏古論三合

移剌溫

蕭仲恭子拱

蕭仲宣

高松

海陵諸子

光英

矧思阿補

廣陽

第二十一

金史八十三

張通古

張浩

張汝霖

張玄素

張汝弼

耶律安禮

納合椿年

祁宰

第二十二

金史八十四

杲

本名撒里喝

耨盭溫敦思忠

子乙迭

溫敦兀帶

奔睹

高禎

白彥敬

張景仁

第二十三

金史八十五

世宗諸子

永中

永蹈

永功子璿

永德

永成

永升

第二十四

金史八十六

李石子獻可

完顏福壽

獨吉義

烏延蒲里黑

烏延蒲轄奴

烏延查刺

李師雄

尼庵古鈔兀

李术魯定方

夾谷胡刺

蒲察幹論

夾谷查刺

第二十五

金史八十七

紇石烈志寧

僕散忠義

徒單合喜

第二十六

金史八十八

紇石烈良弼

完顏守道本名習宜烈

石琚

唐括安禮

移刺道

本名趙三子光祖

第二十七

金史八十九

蘇保衡

翟永固

魏子平

孟浩 田穀附

梁肅

移刺慥

移刺子敬

第二十八

金史九十

趙元

移刺道 本名桉

高德基

馬諷

完顏兀不喝

劉徽柔

賈少冲 子益

移刺幹里朵

阿勒根彥忠

張九思

高衍

楊邦基

丁暉仁

第二十九

金史九十一

完顏撒改

龐迪

溫迪罕移室懋

神土懋

移刺成

石抹卞

楊仲武

蒲察世傑本名阿撒

蕭懷忠

移刺按答

孛術魯阿魯罕

趙興祥

石抹榮

敬嗣暉

第三十

金史九十二

金史目錄下
毛碩

李上達

曹望之

大懷貞

盧孝儉

盧庸

李偁

徒單克寧 本名習顯

第三十一

金史九十三

顯宗諸子

琮

瓌

從彝

從憲

玠

章宗諸子

洪裕

洪靖

洪熙

洪衍

洪輝

忒鄰

衛紹王子

從恪

宣宗三子

莊獻太子

玄齡

守純

獨吉思忠

承裕

僕散揆

抹撚史訖搭

宗浩

第三十二

金史九十四

夾谷清臣

內族襄

夾谷衡

完顏安國

瑤里李迭

第三十三

金史九十五

移刺履

張萬公

蒲察通

粘割幹特刺

程輝

劉瑋

董師中

王蔚

馬惠迪

馬琪

楊伯通

尼庵古鑑

第三十四

金史九十六

黃久約

李晏

李仲略

李愈

王賁

許安仁

梁襄

路伯達

第三十五

金史九十七

裴滿亨

幹勒忠

張大節

張亨

子巖叟

韓錫

鄧儼

巨構

賀楊庭

閻公貞

焦旭

劉仲洙

李完

馬伯祿

楊伯元

劉璣

兄玠

康元弼

移刺益

第三十六

金史九十八

完顏匡

本名撒速

完顏綱

本名元奴

完顏定奴

第三十七

金史九十九

徒單鑑

賈鉉

孫鐸

孫即康

李革

第三十八

金史一百

孟鑄

宗端脩

完顏閭山

路鐸

完顏伯嘉

术虎筠壽

張煒

高竑

李復亨

第三十九

金史一百一

承暉

本名福興

抹撚盡忠

僕散端

本名七斤

耿端義

李英

李木魯德裕

烏古論慶壽

第四十

金史一百二

僕散安貞

田琢

完顏弼

蒙古綱

必蘭阿魯帶

第四十一

金史一百三

完顏仲元

完顏阿鄰

完顏霆

烏古論長壽

完顏佐

石抹仲溫

烏古論禮

蒲察阿禮

奧屯襄

完顏蒲剌都

夾谷石里哥

术甲臣嘉

紇石烈桓端

完顏阿里不孫

完顏鐵哥

納蘭胡魯剌

第四十二

金史一百四

納坦謀嘉

鄒谷

高霖

孟奎

烏林荅與

郭俱

溫迪罕達

王擴

移刺福僧

奧屯忠孝

蒲察思忠

紇石烈胡失門

完顏寓

幹勒合打

蒲察移刺都

第四十三

金史一百五

程案

任熊祥

孔璠

子拯

范拱

張用直

劉樞

王脩

楊伯雄

兄伯淵

蕭貢

溫迪罕締達

張翰

任天寵

第四十四

金史一百六

張暉

張行簡

賈益謙

劉炳

木虎高琪

塔不也

第四十五

金史一百七

高汝勵

張行信

第四十六

金史一百八

胥鼎

侯摯

把胡魯

師安石

第四十七

金史一百九

完顏素蘭

陳規

許古

第四十八

金史一百一十

楊雲翼

趙秉文

韓玉

馮壁

李獻甫

雷淵

程震

第四十九

金史一百一十一

古里甲石倫

內族訛可

撒合輦

強伸

烏林答胡土

內族思烈

紇石烈牙吾塔

第五十

金史一百一十二

完顏合達

移剌蒲阿

第五十一

金史一百一十三

賽不

白撒一名承裔

赤盞合喜

第五十二

金史一百一十四

白華

斜卯愛實合周附

石抹世勣

第五十三

金史一百一十五

完顏奴申

崔立

聶天驥

赤盞尉忻

第五十四

金史一百一十六

徒單兀典

石盞女魯歡

蒲察官奴

內族承立一名慶山奴

第五十五

金史一百一十七

徒單益都

粘合荆山

劉均時

王賓

王進等附

國用安

時青

第五十六

金史一百一十八

苗道潤

王福

移刺衆家奴

武仙

張甫

靖安民

郭文振

胡天作

張開

燕寧

第五十七

金史一百一十九

粘割奴申

劉天起附

完顏婁室

烏古論鎬

張天綱

完顏仲德

第五十八

金史一百二十

世戚

石家奴

裴滿達

忽覲

徒單恭

烏古論蒲魯虎

唐括德溫

烏古論粘沒合

蒲察阿虎迭

烏林荅暉

蒲察鼎壽

徒單思忠

徒單繹

烏林荅復

烏古論元忠

子誼

唐括貢

烏林荅琳

徒單公弼

徒單銘

徒單四喜

第五十九

金史一百二十一

忠義一

胡沙補

特虎雅

僕忽得

粘割韓奴

曹珪

溫迪罕蒲覲

訛里也

納蘭綽赤

魏全

鄯陽

夾谷守中

石林元毅

伯德梅和尚

烏古孫兀屯

高守約

和速嘉安禮

王維翰

移刺古與涅

宋宸

烏古論榮祖

烏古論仲溫

九住

李演

劉德基

王毅

王晦

齊鷹揚

木甲法心

高錫

第六十

金史一百二十二

忠義二

吳僧哥

烏古論德升

張順

馬驤

伯德宏哥

奧敦醜和尚

從垣

孛術魯福壽

吳邦傑

納合蒲刺都

女奚烈幹出

時茂先

溫迪罕老兒

梁持勝

賈邦憲

移刺阿里合

完顏六斤

紇石烈鶴壽

蒲察婁室

女奚烈資祿

趙益

侯小叔

王佐

黃攬九住

烏林答乞住

駝滿斜烈

尼庵古蒲路虎

兀顏畏可

兀顏訛出虎

粘割真

第六十一

金史一百二十三

忠義三

徒單航

完顏陳和尚

楊兀衍

烏古論黑漢

馳滿胡土門

姬汝作

愛申

馬肩龍附

禹顯

第六十二

金史一百二十四

忠義四

馬慶祥

商衡

朮甲脫魯灰

楊達夫

馮延登

烏古孫仲端

烏古孫奴申

蒲察琦

蔡八兒

溫敦昌孫

完顏絳山

畢資倫

郭蝦蟆

第六十三

金史一百二十五

文藝上

韓昉

蔡松年子珪

吳激

馬定國

任詢

趙可

郭長倩

蕭永祺

胡礪

王競

楊伯仁

鄭子聃

党懷英

第六十四

金史一百二十六

文藝下

趙佩

周昂

王庭筠

劉昂

李經

劉從益

呂中孚

張建附

李純甫

王壽

宋九嘉

龐鑄

李獻能

王若虛

王元節

麻九疇

李汾

元德明

子好問

第六十五

金史一百二十七

孝友

溫迪罕幹魯補

陳顏

劉瑜

孟興

王震

劉政

隱逸

褚承亮

王去非

趙質

杜時昇

郝天挺

薛繼先

高仲振

張潛

王汝梅

宋可

辛愿

王予可

第六十六

金史一百二十八

循吏

盧克忠

牛德昌

范承吉

王政

張夾

李瞻

劉敏行

傅慎微

劉煥

高昌福

孫德淵

趙鑑

蒲察鄭留

女奚列守愚

石抹元

張穀

趙重福

武都

紇石烈德

張特立

王浩

第六十七

金史一百二十九

酷吏

高閭山

蒲察合住

佞幸

蕭肄

張仲軻

李通

馬欽

高懷貞

蕭裕

胥持國

第六十八

金史一百三十

列女

阿鄰妻

李寶信妻

韓慶民妻

雷婦師氏

康住住

李文妻

李英妻

相琪妻

阿魯真

撒合輦妻

許古妻

馮妙真

蒲察氏

烏古論氏

素蘭妻

忙哥妻

尹氏

白氏

聶孝女

仲德妻

竇符李氏

張鳳如附

第六十九

金史一百三十一

宦者

梁琬

宋珪

潘守恒附

方技

劉完素

張從正

李慶嗣

紀天錫

張元素

馬貴中

武禎

子亢

李懋

胡德新

第七十

金史一百三十二

金史目錄
三
逆臣

秉德

唐括辨

烏帶

大興國

徒單阿里出虎

僕散師恭

本名忽土

徒單貞

李老僧

完顏元宜

紇石烈執中

第七十一

金史一百三十三

叛臣

張覺

子僅言

耶律余覲

窩斡

第七十二

金史一百三十四

外國上

西夏

第七十三

金史一百三十五

外國下

高麗

國語解

金九帝起太祖收國元年乙未盡哀宗天興三年甲午百二十年

紀十九卷

志三十九卷

表四卷

列傳七十三卷

總一百三十五卷

校勘

臣彭衡

臣倪中

臣麥澂

臣岳信

臣楊鑄

臣牟思善


臣卜勝

臣李源

臣揭模

臣丁士恒

錄卷終



本紀第一

金史一

開府儀同三司柱國錄軍國重事尚書右丞相修國史領經筵事都總裁 脫脫奉

勅修

世紀

金之先出靺鞨氏靺鞨本號勿吉勿吉古肅慎地也元魏時勿吉有七部曰粟末部曰伯咄部曰安車骨部曰拂涅部曰號室部曰黑水部曰白山部隋稱靺鞨而七部並同唐初有黑水靺鞨粟末靺鞨其五部無聞粟末靺鞨始附高麗姓大氏李勣破高麗粟末靺鞨保東牟山後爲渤海稱王傳十餘世有文字禮樂官府制度有五京十五府六

十二州黑水靺鞨居肅慎地東瀕海南接高麗亦附于高麗嘗以兵十五萬衆助高麗拒唐太宗敗于安市開元中來朝置黑水府以部長爲都督刺史置長史監之賜都督姓李氏名獻誠領黑水經略使其後渤海盛強黑水役屬之朝貢遂絕五代時契丹盡取渤海地而黑水靺鞨附屬于契丹其在南者籍契丹號熟女直其在北者不在契丹籍號生女直生女直地有混同江長白山混同江亦號黑龍江所謂白山黑水是也金之始祖諱函普初從高麗來年已六十餘矣兄阿古廼好佛留高麗不肯從曰後世子孫必有能相聚者吾不能去也獨與弟保活里俱始祖居

完顏部僕幹水之涯保活里居耶懶其後胡十門以曷蘇館歸太祖自言其祖兄弟三人相別而去蓋自謂阿古廼之後石土門迪古乃保活里之裔也及太祖敗遼兵于境上獲耶律謝十乃使梁福幹答剌招諭渤海人曰女直渤海本同一家蓋其初皆勿吉之七部也始祖至完顏部居久之其部人嘗殺它族之人由是兩族交惡鬪不能解完顏部人謂始祖曰若能爲部人解此怨使兩族不相殺部有賢女年六十而未嫁當以相配仍爲同部始祖曰諾廼自往諭之曰殺一人而鬪不解損傷益多曷若止誅首亂者一人部內以物納償汝可以無鬪而且獲利焉怨家

從之乃爲約曰凡有殺傷人者徵其家人口一馬十偶牝牛十黃金六兩與所殺傷之家即兩解不得私鬪曰謹如約女直之俗殺人償馬牛三十自此始既備償如約部衆信服之謝以青牛一并許歸六十之婦始祖乃以青牛爲聘禮而納之并得其貲產後生二男長曰烏魯次曰幹魯一女曰注思板遂爲完顏部人天會十四年追謚景元皇帝廟號始祖皇統四年號其藏曰光陵五年增謚始祖懿憲景元皇帝子德帝諱烏魯天會十四年追謚德皇帝皇統四年號其藏曰熙陵五年增謚淵穆玄德皇帝子安帝諱跋海天會十四年追謚安皇帝皇統四年號其藏建陵

五年增謚和靖慶安皇帝子獻祖諱綏可黑水舊俗無室廬負山水坎地梁木其上覆以土夏則出隨水草以居冬則入處其中遷徙不常獻祖乃徙居海古水耕墾樹藝始築室有棟宇之制人呼其地爲納葛里納葛里者漢語居室也自此遂定居于安出虎水之側矣天會十四年追謚定昭皇帝廟號獻祖皇統四年號其藏曰輝陵五年增謚獻祖純烈定昭皇帝子昭祖諱石魯剛毅質直生女直無書契無約束不可檢制昭祖欲稍立條教諸父部人皆不悅欲坑殺之已被執叔父謝里忽知部衆將殺昭祖曰吾兄子賢人也必能承家安輯部衆此輩奈何輒欲坑殺之

亟往彎弓注矢射於衆中刼執者皆散走昭祖乃得免昭祖稍以條教爲治部落寢強遼以惕隱官之諸部猶以舊俗不肯用條教昭祖耀武至于青嶺白山順者撫之不從者討伐之入于蘇濱耶懶之地所至克捷還經僕鶻水僕鶻漢語惡瘡也昭祖惡其地名雖已困憊不肯止行至姑里甸得疾迨夜寢于村舍有盜至遂中夜啓行至逼刺紀村止焉是夕卒載柩而行遇賊於路奪柩去部衆追賊與戰復得柩加古部人蒲虎復來襲之垂及蒲虎問諸路人曰石魯柩去此幾何其人曰遠矣追之不及也蒲虎遂止於是乃得歸葬焉生女直之俗至昭祖時稍用條教民頗

聽從尚未有文字無官府不知歲月晦朔是以年壽脩短莫得而考焉天會十五年追謚成襄皇帝廟號昭祖皇統四年藏號安陵五年增謚昭祖武惠成襄皇帝子景祖諱烏古廼遼太平元年辛酉歲生自始祖至此已六世矣景祖稍役屬諸部自白山耶悔統門耶懶土骨論之屬以至五國之長皆聽命是時遼之邊民有逃而歸者及遼以兵徙鐵勒烏菴之民鐵勒烏菴多不肯徙亦逃而來歸遼使曷魯林牙將兵來索逋逃之民景祖恐遼兵深入盡得山川道路險易或將圖之乃以計止之曰兵若深入諸部必驚擾變生不測逋戶亦不可得非計也曷魯以爲然遂止

其軍與曷魯自行索之是時隣部雖稍從孩懶水烏林答部石顯尚拒阻不服攻之不克景祖以計告於遼主遼主遣使責讓石顯石顯乃遣其子婆諸刊入朝遼主厚賜遣還其後石顯與婆諸刊入見遼主於春蒐遼主乃留石顯於邊地而遣婆諸刊還所部景祖之謀也既而五國蒲聶部節度使拔乙門畔遼鷹路不通遼人將討之先遣同幹來諭旨景祖曰可以計取若用兵彼將走保險阻非歲月可平也遼人從之蓋景祖終畏遼兵之入其境也故自以爲功於是景祖陽與拔乙門爲好而以妻子爲質襲而擒之獻於遼主遼主召見于寢殿燕賜加等以爲生女直部

族節度使遼人呼節度使爲太師金人稱都太師者自此
始遼主將刻印與之景祖不肯繫遼籍辭曰請俟他日遼
主終欲與之遣使來景祖詭使部人揚言曰主公若受印
繫籍部人必殺之用是以拒之遼使乃還旣爲節度使有
官屬紀綱漸立矣生女直舊無鐵隣國有以甲冑來鬻者
傾貲厚賈以與貿易亦令昆弟族人皆售之得鐵旣多因
之以修弓矢備器械兵勢稍振前後願附者衆幹泯水蒲
察部泰神忒保水完顏部統門水溫迪痕部神隱水完顏
部皆相繼來附景祖爲人寬恕能容物平生不見喜愠推
財與人分食解衣無所吝惜人或忤之亦不念先時有畔

去者遣人諭誘之畔者曰汝主活羅也活羅吾能獲之吾豈能爲活羅屈哉活羅漢語慈烏也北方有之狀如大雞善啄物見馬牛橐駝脊間有瘡啄其脊間食之馬牛輒死若飢不得食雖砂石亦食之景祖嗜酒好色飲啗過人時人呼曰活羅故彼以此訕之亦不以介意其後訕者力屈來降厚賜遣還曷懶水有率衆降者錄其歲月姓名即遣去俾復其故人以此益信服之遼咸雍八年五國沒撚部謝野勃堇畔遼鷹路不通景祖伐之謝野來禦景祖被重鎧率衆力戰謝野兵敗走拔里邁濼時方十月冰忽解謝野不能軍衆皆潰去乃旋師道中遇逋亡要遮險阻晝夜

拒戰比至部已憊即往見遼邊將達魯骨自陳敗謝野功
行次來流水未見達魯骨疾作而復卒于家年五十四天
會十四年追謚惠桓皇帝廟號景祖皇統四年藏號定陵
五年增謚景祖英烈惠桓皇帝第二子襲節度使是爲世
祖諱劼里鉢生女直之俗生子年長即異居景祖九子元
配唐括氏生劼者次世祖次劼孫次肅宗次穆宗及當異
居景祖曰劼者柔和可治家務劼里鉢有器量智識何事
不成劼孫亦柔善人耳乃命劼者與世祖同居劼孫與肅
宗同居景祖卒世祖繼之世祖卒肅宗繼之肅宗卒穆宗
繼之穆宗復傳世祖之子至於太祖竟登大位焉世祖遼

重熙八年己卯歲生遼咸雍十年襲節度使景祖異母弟
跋黑有異志世祖慮其爲變加意事之不使將兵但爲部
長跋黑遂誘桓赦散達烏春窩謀罕爲亂及間諸部使貳
于世祖世祖猶欲撫慰之語在跋黑桓赦等傳中世祖嘗
賈加古部鍛工烏不屯被甲九十烏春欲託此以爲兵端
世祖還其甲語在烏春傳部中有流言曰欲生則附於跋
黑欲死則附於劾里鉢頗刺淑世祖聞之疑焉無以察之
乃佯爲具裝欲有所往者陰遣人揚言曰寇至部衆聞者
莫知虛實有保於跋黑之室者有保於世祖之室者世祖
乃盡得兄弟部屬向背彼此之情矣間數年烏春來攻世

祖拒之時十月已半大雨累晝夜冰漸覆地烏春不能進
既而悔曰此天也乃引兵去烏春舍於阿里矮村澤不乃
家而以兵圍其弟勝昆於胡不村兵退勝昆執其兄澤不
乃而請泣殺于世祖且請免其孥戮從之桓赦散達亦舉
兵遣肅宗拒之當是時烏春兵在北桓赦兵在南其勢甚
盛戒之曰可和則與之和否則決戰肅宗兵敗會烏春以
久兩解去世祖乃以偏師涉舍很水經貼割水覆桓赦散
達之家明日大霧晦冥失道至婆多吐水乃覺即還至舍
很貼割之間升高阜望之見六騎來大呼馳擊之世祖射
一人斃生獲五人問之乃知卜灰撒骨出使助桓赦散達

者也世祖至桓赦散達所居焚蕩其室家殺百許人舊將主保亦死之比世祖還與肅宗會肅宗兵又敗矣世祖讓肅宗失利之狀遣人議和桓赦散達曰以爾盈歌之大赤馬辭不失之紫騮馬與我我則和二馬皆女直名馬不許桓赦散達大會諸部來攻過裴滿部以其附於世祖也縱火焚之蒲察部沙祗勃董胡補答勃董使阿喜來告難世祖使之詭從以自全曰戰則以旗鼓自別世祖往禦桓赦之衆將行有報者曰跋黑食於愛妾之父家肉張咽死矣乃遣肅宗求援於遼遂率衆出使辭不失取海姑兄弟兵已而乃知海姑兄弟貳於桓赦矣欲併取其衆徑至海姑偵

者報曰敵已至將戰世祖戒辭不失曰汝先陣於脫豁改
原待吾三揚旗三鳴鼓即棄旗決戰死生惟在今日命不
足惜使裴滿胡喜牽大紫騮馬以爲貳馬馳至陣時桓被
散達盛彊世祖軍吏未戰而懼皆植立無人色世祖陽陽
如平常亦無責讓之言但令士卒解甲少憩以水沃面調
麪水飲之有頃訓勵之軍勢復振乃避衆獨引穆宗執其
手密與之言曰今日之事若勝則已萬一有不勝吾必無
生汝今介馬遙觀勿預戰事若我死汝勿收吾骨勿顧應
親戚亟馳馬奔告汝兄頗刺淑于遼繫籍受印乞師以報
此讎語畢袒袖不被甲以緼袍垂欄護前後心戰弓提劍

三揚旗三鳴鼓棄旗搏戰身爲軍鋒突入敵陣衆從之辭
不失從後奮擊大敗之乘勝逐之自阿不噶至于北隘旬
死者如什麻破多吐水水爲之赤棄車甲馬牛軍實盡獲
之世祖曰今日之捷非天不能及此亦可以知足矣雖縱
之去敗軍之氣沒世不振乃引軍還世祖視其戰地馳突
成大路闊且三十隴手殺九人自相重積人皆異之桓赧
散達自此不能復聚未幾各以其屬來降遼大安七年也
初桓赧兄弟之變不朮魯部卜灰蒲察部撒骨出助之至
是招之不肯和卜灰之黨石魯遂殺卜灰來降撒骨出追
躡亡者道傍人潛射之中口而死自是舊部悉歸景祖時

幹勒部人盃乃來屬及是有他志會其家失火因以縱火
誣歡都世祖徵償如約盃乃不自安遂結烏春窩謀罕舉
兵使肅宗與戰敗之獲盃乃世祖獻之於遼臘醅麻產侵
掠野居女直略來流水牧馬世祖擊之中四創久之疾愈
臘醅等復略穆宗牧馬交結諸部世祖復伐之臘醅等給
降乃旋臘醅得姑里甸兵百十有七人據暮稜水守險石
顯子婆諸刊亦在其中世祖圍而克之盡獲姑里甸兵麻
產遁去遂擒臘醅及婆諸刊皆獻之遼既已復請之遼人
與之并以前後所獻罪人歸之歡都在破烏春等於斜堆
故石拔石皆就擒世祖自將與歡都合兵嶺東諸軍皆至

是時烏春已前死窩謀罕請于遼願和解旣與和復來襲乃進軍圍之窩謀罕棄城遁去破其城盡俘獲之以功差次分賜諸軍城始破議渠長生殺衆皆長跪遼使者在坐忽一人佩長刀突前咫尺謂世祖曰勿殺我遼使及左右皆走匿世祖色不少動執其人之手語之曰吾不殺汝也於是罰左右匿者曰汝等何敢失次耶罰旣已乃徐使執突前者殺之其膽勇鎮物如此師還寢疾遂篤元娶拏懶氏哭不止世祖曰汝勿哭汝惟後我一歲耳肅宗請後事曰汝惟後我三年肅宗出謂人曰吾兄至此亦不與我好言乃叩地而哭俄呼穆宗謂曰烏雅東柔善若辨集契丹

事阿骨打能之遼大安八年五月十五日卒襲位十九年
年五十四明年挾懶氏卒又明年肅宗卒肅宗病篤歎曰
我兄真多智哉世祖天性嚴重有智識一見必識暫聞不
忘凝寒不縮栗動止不回顧每戰未嘗被甲先以夢兆候
其勝負嘗乘醉騎驢入室中明日見驢足跡問而知之自
是不復飲酒襲位之初內外潰叛締交爲寇世祖乃因敗
爲功變弱爲彊旣破桓被散達烏春窩謀罕基業自此大
矣天會十五年追謚聖肅皇帝廟號世祖皇統四年號其
藏曰永陵五年增謚世祖神武聖肅皇帝母弟頗刺淑襲
節度使景祖第四子也是爲肅宗遼重熙十一年壬午歲

生在父兄時號國相國相之稱不知始何時初雅達爲國相雅達者桓被散達之父也景祖以幣馬求之於雅達而命肅宗爲之肅宗自幼機敏善辯當其兄時身居國相盡心匡輔是時叔父跋黑有異志及桓被散達烏春窩謀罕石顯父子臘醢麻產作難用兵之際肅宗屢當一面尤能知遼人國政人情凡有遼事一切委之肅宗專心焉凡白事於遼官皆令遠跪陳辭譯者傳致之往往爲譯者錯亂肅宗欲得自前委曲言之故先不以實告譯者譯者惑之不得已引之前使自言乃以草木瓦石爲籌枚數其事而陳之官吏聽者皆愕然問其故則爲卑辭以對曰鄙陋無

文故如此官吏以爲實然不復疑之是以所訴無不如意
桓被散達之戰部人賽罕死之其弟活羅陰懷忿怨一日
忽以劒脊置肅宗項上曰吾兄爲汝輩死矣劉汝以償則
如之何久之因其兄柩至遂怒而攻習不出習不出走避
之攻肅宗于家矢注次室之裙著于門扉復攻歡都歡都
衷甲拒于室中既不能入持其門旗而去往附盃乃盃乃
誘烏春兵度嶺世祖與遇于蘇素海甸世祖曰予昔有異
夢今不可親戰若左軍中有力戰者則大功成矣命肅宗
及斜列辭不失與之戰肅宗下馬名呼世祖復自呼其名
而言曰若天助我當爲衆部長則今日之事神祇監之語

本紀
三
畢再拜遂炷火束緼頃之大風自後起火益熾是時八月
并青草皆焚之煙焰漲天我軍隨煙衝擊大敗之遂獲盃
乃囚而獻諸遼并獲活羅肅宗釋其罪左右任使之後竟
得其力焉大安八年自國相襲位是時麻產尚據直屋鎧
水繕完營堡誘納亡命招之不聽遣康宗伐之太祖別軍
取麻產家屬錡金無遺既獲麻產殺之獻馘于遼陶溫水
民來附二年癸酉遣太祖以偏師伐泥厖古部帥水抹離
海村跋黑播立開平之自是寇賊皆息三年八月肅宗卒
天會十五年追謚穆憲皇帝皇統四年藏號泰陵五年增
謚肅宗明睿穆憲皇帝母弟穆宗諱盈歌字烏魯完景祖

第五子也南人稱楊割太師又曰楊割追謚孝平皇帝號
穆宗又曰楊割號仁祖金代無號仁祖者穆宗諱盈歌謚
孝平盈近揚歌近割南北音訛遼人呼節度使爲太師自
景祖至太祖皆有是稱凡叢言松漠記張棣金志等書皆
無足取穆宗遼重熙二十一年癸巳歲生肅宗時擒麻產
遼命穆宗爲詳穩大安十年甲戌襲節度使年四十二以
兄劾者子撒改爲國相三年丙子唐括部跋葛勒董與溫
都部人跋忒有舊跋葛以事往跋忒殺跋葛使太祖率師
伐跋忒跋忒亡去追及殺之星顯水紇石烈部阿疎毛睹
祿阻兵爲難穆宗自將伐阿疎撒改以偏師攻鈍恩城拔

之阿疎初聞來伐乃自訴于遼遂留劾者守阿疎城穆宗
乃還會陶溫水徒籠古水紇石烈部阿閭版及石魯阻五
國鷹路執殺遼捕鷹使者遼詔穆宗討之阿閭版等據險
立柵方大寒乃募善射者操勁弓利矢攻之數日入其城
出遼使存者數人俾之歸統門渾蠡水之交烏古論部留
可詐都與蘇濱水烏古論敵庫德起兵于米里迷石罕城
納根涅之子鈍恩亦亡去於是兩黨作難八月撒改爲都
統辭不失阿里合滿幹帶副之以伐留可詐都塢塔等謾
都訶石土門伐敵庫德撒改欲先平邊地城堡或欲先取
留可莫能決乃命太祖往鈍恩將援留可乘謾都訶兵未

集而攻之石土門軍既與謾都訶會迎擊鈍恩大敗之降
米里迷石罕城獲鈍恩敵庫德釋弗殺太祖度盆搦嶺與
撒改會攻破留可城留可已先往遼矣盡殺其城中渠長
還圍塢塔城塢塔先已亡在外城降於軍詐都亦降於蒲
家奴於是撫寧諸路如舊時太祖因致穆宗教統門渾蠢
耶悔星顯四路及嶺東諸部自今勿復稱都部長命勝管
醜阿等撫定乙離骨嶺注阿門水之西諸部居民又命幹
帶及偏裨悉平二涅囊虎二蠢出等路寇盜而還七年庚
辰勅者尚守阿疎城毛睹祿來降阿疎猶在遼遼使使來
罷兵未到穆宗使烏林荅石魯往佐勅者戒之曰遼使來

罷兵但換我軍衣服旗幟與阿疎城中無辨勿令遼使知之因戒効者曰遼使可以計却勿聽其言遼罷兵也遼使果來罷兵穆宗使蒲察部胡魯董邈遜孛董與俱至阿疎城効者見遼使詭謂胡魯邈遜曰我部族自相攻擊干汝等何事誰識汝之太師乃援劍刺殺胡魯邈遜所乘馬遼使驚駭遽走不敢回顧徑歸居數日破其城狄故保還自遼在城中執而殺之阿疎復訴於遼遼遣奚節度使乙烈來穆宗至來流水興和村見乙烈問阿疎城事命穆宗曰凡攻城所獲存者復與之不存者備償且徵馬數百匹穆宗與僚佐謀曰若償阿疎則諸部不復可號令任使也

乃令主隈秃荅兩水之民陽爲阻絕鷹路復使鼉故德部
節度使言于遼曰欲開鷹路非生女直節度使不可遼不
知其爲穆宗謀也信之命穆宗計阻絕鷹路者而阿疎城
事遂止穆宗聲言平鷹路畋於土溫水而歸是歲留可來
降八年辛巳遼使使持賜物來賞平鷹路之有功者九年
壬午使蒲家奴以遼賜給主隈秃荅之民且修鷹路而歸
冬蕭海里叛入于係案女直阿典部遣其族人幹達刺來
結和曰願與太師爲友同往伐遼穆宗執幹達刺會遼命
穆宗捕討海里穆宗送幹達刺于遼募軍得甲千餘女直
甲兵之數始見于此蓋未嘗滿千也軍次混同水蕭海里

再使人來復執之既而與海里遇海里遙問曰我使者安在對曰與後人偕來海里不信是時遼追海里兵數千人攻之不能克穆宗謂遼將曰退爾軍我當獨取海里遼將許之太祖策馬突戰流矢中海里首海里墮馬下執而殺之大破其軍使阿离合懣獻馘于遼金人自此知遼兵之易與也是役也康宗最先登於是以先登并有功者爲前行次以諸軍護俘獲歸所部穆宗朝遼主于漁所大被嘉賞授以使相錫予加等十年癸未二月穆宗還遼使使授從破海里者官賞高麗始來通好十月二十九日穆宗卒年五十有一初諸部各有信牌穆宗用太祖議擅置牌號

盤淑敬

本紀
團練使十四人語在高麗傳中二年甲申高麗再來伐石
適歡再破之高麗復請和前所執團練十四人皆遣歸石
適歡撫定邊民而還蘇濱水民不聽命使幹帶等至活羅
海川召諸官僚告諭之舍國部蘇濱水居幹豁勃董不至
幹准部職德部旣至復亡去塢塔遇二部於馬紀嶺執之
而來遂伐幹豁克之幹帶進至北琴海攻拔泓忒城乃還
四年丙戌高麗遣黑歡方石來賀襲位遣孟魯報之高麗
約還諸亡在彼者乃使阿聒勝昆往受之高麗背約殺二
使築九城於曷懶甸以兵數萬來攻幹賽敗之幹魯亦築
九城與高麗九城相對高麗復來攻幹賽復敗之高麗約

以還逋逃之人退九城之軍復所侵故地九月乃罷兵七年己丑歲不登減盜賊徵償振貧乏者十一年癸酉康宗卒年五十三天會十五年追謚恭簡皇帝皇統四年號其藏曰喬陵五年增謚康宗獻敏恭簡皇帝

贊曰金之厥初兄弟三人亦微矣熙宗追帝祖宗定著始祖景祖世祖廟世世不桃始祖娶六十之婦而生二男一女豈非天耶景祖不受遼籍遼印取雅達國相以與其子世祖既破桓黻散達遼政日衰而以太祖屬之穆宗其思慮豈不深遠矣夫

本紀第一

本紀第二

金史二

開府儀同三司柱國錄軍國事兼中書省丞相樞密院事領經筵事都總督 脫脫奉

勅修

太祖

太祖應乾興運昭德定功仁明莊孝大聖武元皇帝諱旻
本諱阿骨打世祖第二子也母曰翼簡皇后拏懶氏遼道
宗時有五色雲氣屢出東方大若二千斛困倉之狀司天
孔致和竊謂人曰其下當生異人建非常之事天以象告
非人力所能爲也咸雍四年戊申七月一日太祖生幼時
與群兒戲力兼數輩舉止端重世祖尤愛之世祖與臘醅

麻產戰於野鵲水世祖被四創疾困坐太祖于膝循其髮而撫之曰此兒長大吾復何憂十歲好弓矢甫成童即善射一日遼使坐府中顧見太祖手持弓矢使射群鳥連三發皆中遼使矍然曰奇男子也太祖嘗宴統石烈部活窩罕家散步門外南望高阜使衆射之皆不能至太祖一發過之度所至踰三百二十步宗室謾都訶最善射遠其不及者猶百步也天德三年立射碑以識焉世祖伐卜灰太祖因辭不失請從行世祖不許而心異之烏春旣死窩謀罕請和旣請和復來攻遂圍其城太祖年二十三被短甲免胄不介馬行圍號令諸軍城中望而識之壯士太峪乘

駿馬持槍出城馳刺太祖太祖不及備舅氏活臘胡馳出
其間擊太峪槍折刺中其馬太峪僅得免嘗與沙忽帶出
營殺略不令世祖知之且還敵以重兵追之獨行隘巷中
失道追者益急值高岸與人等馬一躍而過追者乃還世
祖寢疾太祖以事如遼統軍司將行世祖戒之曰汝速了
此事五月未半而歸則我猶及見汝也太祖徃見曷魯驤
古統軍既畢事前世祖沒一日還至家世祖見太祖來所
請事皆如志喜甚執太祖手抱其頸而撫之謂穆宗曰烏
雅東柔善惟此子足了契丹事穆宗亦雅重太祖出入必
俱太祖遠出而歸穆宗必親迓之世祖已擒臘醅麻產尙

據直屋鎧水肅宗使太祖先取麻產家屬康宗至直屋鎧水圍之太祖會軍親獲麻產獻馘於遼遼命太祖爲詳穩仍命穆宗辭不失歡都皆爲詳穩久之以偏師伐泥泥古部跋黑播立開等乃以達達阿爲鄉導沿帥水夜行襲之鹵其妻子初溫都部跋忒殺唐括部跋葛穆宗命太祖伐之太祖入辭謂穆宗曰昨夕見赤祥此行必克敵遂行是歲大雪寒甚與烏古論部兵沿土溫水過末鄰鄉追及跋忒於阿斯溫山北灤之間殺之軍還穆宗親迓太祖于靄建村撒改以都統伐留可謾都訶合石土門伐敵庫德撒改與將佐議或欲先平邊地部落城堡或欲徑攻留可城

議不能決願得太祖至軍中穆宗使太祖往曰事必有可
擬軍之未發者止有甲士七十盡以畀汝謾都訶在米里
迷石罕城下石土門未到土人欲執謾都訶以與敵使來
告急遇太祖於斜堆甸太祖曰國兵盡在此矣使敵先得
志於謾都訶後雖種誅之何益也乃分甲士四十與之太
祖以三十人詣撒改軍道遇人曰敵已據盆搨嶺南路矣
衆欲由沙偏嶺往太祖曰汝等畏敵邪旣度盆搨嶺不見
敵已而聞敵乃守沙偏嶺以拒我及至撒改軍夜急攻之
遲明破其衆是時留可塢塔皆在遼旣破留可還攻塢塔
城城中人以城降初太祖過盆搨嶺經塢塔城下從騎有

後者塢塔城人攻而奪之金太祖駐馬呼謂之曰毋取我
炊食器其人謾言曰公能來此何憂不得食太祖以鞭指
之曰吾破留可即於汝乎取之至是其人持金而前曰奴
輩誰敢毀詳穩之器也遣蒲家奴招詐都詐都乃降釋之
穆宗將伐蕭海里募兵得千餘人女直兵未嘗滿千至是
太祖勇氣自倍曰有此甲兵何事不可圖也海里來戰與
遼兵合因止遼人自爲戰勅海留守以甲贈太祖太祖亦
不受穆宗問何爲不受曰被彼甲而戰戰勝則是因彼成
功也穆宗末年令諸部不得擅置信牌馳驛訊事號令自
此始一皆自太祖啓之康宗七年歲不登民多流莩强者

轉而爲盜歟都等欲重其法爲盜者皆殺之太祖曰以財
殺人不可財者人所致也遂減盜賊徵償法爲徵三倍民
間多逋負賣妻子不能償康宗與官屬會議太祖在外庭
以帛繫杖端麾其衆令曰今貧者不能自活賣妻子以償
債骨肉之愛人心所同自今三年勿徵過三年徐圖之衆皆
聽令聞者感泣自是遠近歸心焉歲癸巳十月康宗夢逐
狼屢發不能中太祖前射中之旦日以所夢問僚佐衆皆
曰吉兄不能得而弟得之之兆也是月康宗即世太祖襲
位爲都勃極烈遼使阿息保來曰何以不告喪太祖曰有
喪不能弔而乃以爲罪乎他日阿息保後來徑騎至康宗

殞所閱贈馬欲取之太祖怒將殺之宗雄諫而止旣而遼命久不至遼主好畋獵淫酗怠于政事四方奏事往往不見省紇石烈阿疎旣奔遼穆宗取其城及其部衆不能歸遂與族弟銀术可辭里罕陰結南江居人渾都僕速欲與俱亡入高麗事覺太祖使夾古撒喝捕之而銀术可辭里罕先爲遼戍所獲渾都僕速已亡去撒喝取其妻子而還二年甲午六月太祖至江西遼使使來致襲節度之命初遼每歲遣使市名鷹海東青于海上道出境內使者貪縱徵索無藝公私厭苦之康宗嘗以不遣阿疎爲言稍拒其使者太祖嗣節度亦遣蒲家奴往索阿疎故常以此二者

爲言終至于滅遼然後已至是復遣宗室習古廼完顏銀
术可往索阿疎習古廼等還具言遼主驕肆廢弛之狀於
是召官僚耆舊以伐遼告之使備衝要建城堡修戎器以
聽後命遼統軍司聞之使節度使捏哥來問狀曰汝等有
異志乎修戰具飭守備將以誰禦太祖荅之曰設險自守
又何問哉遼復遣阿息保來詰之太祖謂之曰我小國也
事大國不敢廢禮大國德澤不施而逋逃是主以此字小
能無望乎若以阿疎與我請事朝貢苟不獲已豈能束手
受制也阿息保還遼人始爲備命統軍蕭撻不野調諸軍
於寧江州太祖聞之使僕聒剌復索阿疎實觀其形勢僕

聒刺還言遼兵多不知其數太祖曰彼初調兵豈能遽集如此復遣胡沙保往還言惟四院統軍司與寧江州軍及渤海八百人耳太祖曰果如吾言謂諸將佐曰遼人知我將舉兵集諸路軍備我我先發制之無爲人制衆皆曰善乃入見宣靖皇后告以伐遼事后曰汝嗣父兄立邦家見可則行吾老矣無貽我憂汝必不至是也太祖感泣奉觴爲壽即奉后率諸將出門舉觴東向以遼人荒肆不歸阿疎并已用兵之意禱于皇天后土酹畢后命太祖正坐與僚屬會酒號令諸部使婆盧火徵移懶路迪古乃兵幹魯古阿魯撫諭幹忽急賽兩路係遼籍女直實不迭往完

睹路執遼障鷹官達魯古部副使辭列寧江州渤海大家
奴於是達魯古部實里館來告曰聞舉兵伐遼我部誰從
太祖曰吾兵雖少舊國也與汝隣境固當從我若畏遼人
自往就之九月太祖進軍寧江州次寥晦城婆廬火徵兵
後期杖之復遣督軍諸路兵皆會于來流水得二千五百
人致遼之罪申告于天地曰世事遼國恪修職貢定烏春
窩謀罕之亂破蕭海里之衆有功不省而侵侮是加罪人
阿疎屢請不遣今將問罪於遼天地其鑒佑之遂命諸將
傳挺而誓曰汝等同心盡力有功者奴婢部曲爲良庶人
官之先有官者叙進輕重眦功苟違誓言身死挺下家屬

無赦師次唐括帶幹甲之地諸軍攘射介而立有光如烈火起於人足及戈矛之上人以爲兵祥明日次扎只水光見如初將至遼界先使宗幹督士卒夷塹旣度遇渤海軍攻我左翼七謀克衆少却敵兵直犯中軍斜也出戰哲垓先驅太祖曰戰不可易也遣宗幹止之宗幹馳出斜也前控止哲垓馬斜也遂與俱還敵人從之耶律謝十墜馬遼人前救太祖射救者斃併射謝十中之有騎突前又射之徹扎洞胷謝十拔箭走追射之中其背飲矢之半僨而死獲所乘馬宗幹與數騎陷遼軍中太祖救之免胄戰或自傍射之矢拂于額太祖顧見射者一矢而斃謂將士曰盡

敵而止衆從之勇氣自倍敵大奔相蹂踐死者十七八撒
改在別路不及會戰使人以戰勝告之而以謝十馬賜之
撒改使其子宗翰完顏希尹來賀且稱帝因勸進太祖曰
一戰而勝遂稱大號何示人淺也進軍寧江州諸軍填塹
攻城寧江人自東門出溫迪痕阿徒罕邀擊盡殪之十月
朔克其城獲防禦使大藥師奴陰縱之使招諭遼人鐵驪
部來送款次來流城以俘獲賜將士召渤海梁福幹答刺
使之僞亡去招諭其鄉人曰女直渤海本同一家我興師
伐罪不濫及無辜也使完顏婁室招諭係遼籍女直師還
謁宣靖皇后以所獲頒宗室耆老以實里館貲產給將士

初命諸路以三百戶爲謀克十謀克爲猛安酬幹等撫定
讒謀水女直龍古酋長胡蘇魯以城降十一月遼都統蕭
糺里副都統撻不野將步騎十萬會于鴨子河北太祖自
將擊之未至鴨子河旣夜太祖方就枕若有扶其首者三
寤而起曰神明警我也即鳴鼓舉燧而行黎明及河遼兵
方壞凌道選壯士十輩擊走之大軍繼進遂登岸甲士三
千七百至者纔三之一俄與敵遇于出河店會大風起塵埃
蔽天乘風勢擊之遼兵潰逐至斡論灤殺獲首虜及車馬
甲兵珍玩不可勝計徧賜官屬將士燕犒彌日遼人嘗言
女直兵若滿萬則不可敵至是始滿萬云幹魯敗遼兵斬

其節度使撻不野僕廸等攻賓州拔之兀惹雛鵠室來降
遼將赤狗兒戰于賓州僕廸渾黜敗之鐵驪王回鶻保以
所部降吾睹補蒲察復敗赤狗兒蕭乙薛軍于祥州東幹
忽急塞兩路降幹魯古敗遼軍于咸州西斬統軍婁實于
陣完顏婁室克咸州是月其乞買撒改辭不失率官屬諸
將勸進願以新歲元日恭上尊號太祖不許阿离合蒧蒲
家奴宗翰等進曰今大功已建若不稱號無以繫天下心
太祖曰吾將思之

收國元年正月壬申朔群臣奉上尊號是日即皇帝位上
曰遼以賓鐵爲號取其堅也賓鐵雖堅終亦變壞惟金不

變不壞金之色白完顏部色尚白於是國號大金改元收
國丙子上自將攻黃龍府進臨益州州人走保黃龍取其
餘民以歸遼遣都統耶律訛里朶左副統蕭乙薛右副統
耶律張奴都監蕭謝佛留騎二十萬步卒七萬戍邊留婁
室銀术可守黃龍上率兵趨達魯古城次寧江州西遼使
僧家奴來議和國書斤上名且使爲屬國庚子進師有火
光正圓自空而墜上曰此祥徵殆天助也酌白水而拜將
士莫不喜躍進逼達魯古城上登高望遼兵若連雲灌木
狀顧謂左右曰遼兵心貳而情怯雖多不足畏遂趨高阜
爲陣宗雄以右翼先馳遼左軍左軍却左翼出其陣後遼

右軍皆力戰婁室銀朮可衝其中堅凡九陷陣皆力戰而出宗翰請以中軍助之上使宗幹往爲疑兵宗雄已得利擊遼右軍遼兵遂敗乘勝追躡至其營會日已暮圍之黎明遼軍潰圍出逐北至阿婁岡遼步卒盡殪得其耕具數千以給諸軍是役也遼人本欲屯田且戰且守故併其耕具獲之二月師還三月辛未朔獵于寨晦城四月遼耶律張奴以國書來上以書辭慢侮留其五人獨遣張奴回報書亦如之五月庚午朔避暑于近郊甲戌拜天射柳故事五月五日七月十五日九月九日拜天射柳歲以爲常六月己亥朔遼耶律張奴復以國書來猶斥上名上亦斥遼

主名以復之且諭之使降七月戊辰以弟吳乞買爲諳班
勃極烈國相撒改爲國論勃極烈辭不失爲阿買勃極烈
弟斜也爲國論勃極烈甲戌遼使辭刺以書來留之不遣
九百奚營來降八月戊戌上親征黃龍府次混同江無舟
上使一人道前乘赭白馬徑涉曰視吾鞭所指而行諸軍
隨之水及馬腹後使舟人測其渡處深不得其底熙宗天
眷二年以黃龍府爲濟州軍曰利涉蓋以太祖涉濟故也
九月克黃龍府遣辭刺還遂班師至江徑渡如前丁丑至
自黃龍府己卯黃龍見空中癸巳以國論勃極烈撒改爲
國論忽魯勃極烈阿离合懣爲國論乙室勃極烈十一月

遼主聞取黃龍府大懼自將七十萬至駝門駙馬蕭特末
林牙蕭查刺等將騎五萬步四十萬至幹鄰灤上自將禦
之十二月己亥行次爰刺會諸將議皆曰遼兵號七十萬
其鋒未易當吾軍遠來人馬疲乏宜駐于此深溝高壘以
待上從之遣迪古乃銀朮可鎮達魯古丁未上以騎兵親
候遼軍獲督餉者知遼主以張奴叛西還二日矣是日上
還至熟結灤有光見于矛端戊申諸將曰今遼主旣還可
乘怠追擊之上曰敵來不迎戰去而追之欲以此爲勇邪
衆皆悚愧願自効上復曰誠欲追敵約齋以往無事餽饋
若破敵何求不得衆皆奮躍追及遼主于護步答岡是役

也兵止二萬上曰彼衆我寡兵不可分視其中軍最堅遼主必在焉敗其中軍可以得志使右翼先戰兵數交左翼合而攻之遼兵大潰我師馳之橫出其中遼師敗績死者相屬百餘里獲輿輦布幄兵械軍資他寶物馬牛不可勝計是戰斜也援矛殺數十人阿离本被圍溫迪罕迪忽迭以四謀克兵出之完顏蒙剗身被數創力戰不已功皆論最蕭特末等焚營遁去遂班師夾谷撒喝取開州婆盧火下特鄰城辭里罕降

二年正月戊子詔曰自破遼兵四方來降者衆宜加優恤自今契丹奚漢渤海係遼籍女直韋室達魯古兀惹鐵驪

諸部官民已降或爲軍所俘獲逃遯而還者勿以爲罪其
酋長仍官之且使從宜居廬閏月高永昌據東京使撻不
野來求援高麗遣使來賀撻且求保州詔許自取之二月
己巳詔曰比以歲凶庶民艱食多依附豪族因爲奴隸及
有犯法徵償莫辦折身爲奴者或私約立限以人對贖過
期則爲奴者並聽以兩人贖一爲良若元約以一人贖者
即從元約四月乙丑以幹魯統內外諸軍與蒲察迪古乃
會咸州路都統幹魯古討高永昌胡沙補等被害五月幹
魯等敗永昌撻不野擒永昌以獻戮之于軍東京州縣及
南路係遼女直皆降詔除遼法省稅賦置猛安謀克一如

本朝之制以幹魯爲南路都統迭勃極烈阿徒罕破遼兵六萬于照散城九月己亥上獵近郊乙巳南路都統幹魯來見于婆廬買水始製金牌十二月庚申朔詣班勃極烈吳乞買及羣臣上尊號曰大聖皇帝改明年爲天輔元年天輔元年正月開州叛加古撒喝等討平之國論昊勃極烈斜也以兵一萬取泰州四月遼秦晉國王耶律捏里來伐迪古乃婁室婆廬火將兵二萬會咸州路都統幹魯古擊之五月丁巳詔自收寧江州已後同姓爲婚者杖而離之七月戊申以完顏幹論知東京事八月癸亥高麗遣使來請保州十二月甲子幹魯古等敗耶律捏里兵于蒺藜

山拔顯州乾懿豪徽成川惠等州皆降是月宋使登州防禦使馬政以國書來其略曰日出之分實生聖人竊聞征遼屢破勅敵若克遼之後五代時陷入契丹漢地願畀下邑

二年正月庚寅遼雙州節度使張崇降使散覩如宋報聘書曰所請之地今當與宋夾攻得者有之二月癸丑朔遼使耶律奴哥等來議和辛酉李董迪古乃婁室來見上以遼主近在中京而敢輒來皆杖之効里保雙古等言咸州都統幹魯古知遼主在中京而不進討芻糧豐足而不以實聞攻顯州時所獲生口財畜多自取三月癸未朔命閣

哥代爲都統而鞠治之幹魯古坐降謀克壬辰遼使耶律
奴哥以國書來庚子以婁室言黃龍府地僻且遠宜重戍
守乃命合諸路謀克以婁室爲萬戶鎮之四月辛巳遼使
以國書來五月丙申命胡突哀如遼六月甲寅詔有司禁
民凌虐典崔良人及倍取贖直者甲戌遼通祺雙遼等州
八百餘戶來歸命分置諸部擇膏腴之地處之七月癸未
詔曰匹里水路完顏朮里古渤海大家奴等六謀克貧乏
之民昔嘗給以官糧置之漁獵之地今歷日已久不知登
耗可具其數以聞胡突哀還自遼耶律奴哥復以國書來
丙申胡突哀如遼遼戶二百來歸處之泰州詔遣阿里骨

李家奴特里底招諭未降者仍詔達魯古部勃堇辭列凡
降附新民善爲存撫來者各令從便安居給以官糧毋輒
動擾八月胡突來還自遼耶律奴哥突迭復以國書來九
月戊子詔曰國書詔令宜選善屬文者爲之其令所在訪
求博學雄才之士敦遣赴闕閏月庚戌朔以降將霍石韓
慶和爲千戶九百奚部蕭寶乙辛北部訛里野漢人王六
兒王伯龍契丹特末高從祐等各率衆來降遼耶律奴哥
以國書來十月癸未以龍化州降者張應古劉仲良爲千
戶乙未咸州都統司言漢人李孝功渤海二哥率衆來降
命各以所部爲千戶十二月甲辰遣李董朮李以定遼地

本紀
論高麗耶律奴哥以國書來遼懿州節度使劉宏以戶三千并執遼候人來降以爲千戶川州寇二萬已降復叛紇石烈照里擊破之

三年正月甲寅東京人爲質者求吉等五人結衆叛事覺誅其首惡餘皆杖百沒入在行家屬資產之半詔知東京事幹論繼有犯者並如之丙辰詔鼂古孛董酬幹曰胡魯古迭八合二部來送款若等先時不無交惡自今毋相侵擾三月耶律奴哥以國書來四月丙子朔日有食之五月壬戌詔咸州路都統司曰兵興以前曷蘇館回怕里與係遼籍不係遼籍女直戶民有犯罪流竄邊境或亡入于遼

者本皆吾民遠在異境朕甚憫之今既議和當行理索可
明諭諸路千戶謀克徧與詢訪其官稱名氏地里具錄以
上六月辛卯遼遣太傅習泥烈等奉冊璽來上摘冊文不
合者數事復之散覲還自宋宋使馬政及其子宏來聘散
覲受宋團練使上怒杖而奪之宋使還復遣孛董辭列曷
魯等如宋七月辛亥遼人楊詢卿羅子韋各率衆來降命
各以所部爲謀克八月己丑頒女直字九月以遼冊禮使
失期詔諸路軍過江屯駐十一月習泥列等復以國書來
曷懶甸長城高麗增築三尺詔胡剌古習顯慎固營壘
四年二月辭列曷魯還自宋宋使趙良嗣王暉來議燕京

西京地三月甲辰上謂羣臣曰遼人屢敗遣使求成惟飾
虛辭以爲緩師之計當議進討其令咸州路統軍司治軍
旅修器械具數以聞辛酉詔咸州路都統司曰朕以遼國
和議無成將以四月二十五日進師令斜葛留兵一千鎮
守闕毋以餘兵來會于渾河遼習泥烈以國書來四月乙
未上自將伐遼以遼使習泥烈宋使趙良嗣等從行五月
甲辰次渾河西使宗雄先趨上京遣降者馬乙持詔諭城
中壬子至上京詔官民曰遼主失道上下同怨朕興兵以
來所過城邑負固不服者即攻拔之降者撫恤之汝等必
聞之矣今爾國和好之事反覆見欺朕不欲天下生靈久

雅塗炭遂決策進討比遣宗雄等相繼招諭尚不聽從今
若攻之則城破矣重以弔伐之義不欲殘民故開示明詔
諭以禍福其審圖之上京人恃禦備儲蓄爲固守計甲寅
亟命進攻上謂習泥烈趙良嗣等曰汝可觀吾用兵以卜
去就上親臨城督將士諸軍鼓譟而進自旦及已闔毋以
麾下先登克其外城留守撻不野以城降趙良嗣等奉觴
爲壽皆稱萬歲是日赦上京官民詔諭遼副統余覲壬戌
次沃黑河宗幹率羣臣諫曰地遠時暑軍馬罷乏若深入
敵境糧餽乏絕恐有後艱上從之乃班師命分兵攻慶州
余覲襲闐毋於遼河完顏背答烏塔等戰却之完顏特虎

死焉七月癸卯上至自伐遼九月燭隈水部實里古達等殺孛董酬幹僕忽得以叛十月戊辰朔日有食之戊寅命幹魯分胡刺古烏春之兵以討實里古達十一月東京留守司乞本京官民質子增數番代上不許曰諸質子已各受田廬若復番代則往來動搖可並仍舊十二月宋復使馬政來請西京之地

五年春正月幹魯敗實里古達於合撻刺山誅首惡四人餘悉撫定二月遣昱及宗雄分諸路猛安謀克之民萬戶屯泰州以婆廬火統之賜耕牛五十四月乙丑朔宗翰請伐遼詔諸路預戒軍事五月遼都統耶律余睹等詣咸州

降閏月辛巳國論胡魯勃極烈撒改薨六月癸巳余覲與
其將吏來見丙申千戶胡離荅坐檀署部人爲蒲里衍杖
一百罷之庚子詔諳版勃極烈吳乞買貳國政以吳勃極
烈斜也爲忽魯勃極烈蒲家奴爲吳勃極烈宗翰爲移賚
勃極烈七月庚辰詔咸州都統司曰自余睹來灼見遼國
事宜已決議親征其治軍以俟師期尋以連雨罷親征命
吳勃極烈昱爲都統移賚勃極烈宗翰副之帥師而西十
一月辛丑以忽魯勃極烈杲爲內外諸軍都統以昱宗翰
宗幹宗望宗盤等副之甲辰詔曰遼政不綱人神共棄今
欲中外一統故命汝率大軍以行討伐爾其慎重兵事擇

用善謀賞罰必行糧餉必繼勿擾降服勿縱俘掠見可而進無淹師期事有從權毋須申稟戊申詔曰若克中京所得禮樂儀仗圖書文籍並先次津發赴闕

六年正月癸酉都統杲克高恩回紇三城乙亥取中京遂下澤州二月庚寅朔日有食之己亥宗翰等敗遼奚王霞末于北安州降奚部西節度使訛里剌以本部降壬寅都統杲遣使來奏捷并獻所獲貨寶詔曰汝等提兵于外克副所任攻下城邑撫安人民朕甚嘉之所言分遣將士招降山前諸部計悉以撫定續遣來報山後若未可往即營田牧馬俟及秋成乃圖大舉更當熟議見可則行如欲益

兵具數來上不可恃一戰之勝輒有弛慢新降附者當善撫存宣諭將士使知朕意宗翰駐北安遣希尹等略地獲遼護衛耶律習泥烈知遼主獵鴛鴦濼以其子晉王賢而有人望惡而殺之衆益離心雖有西北西南兩路兵馬皆羸弱遂遣耨盩溫都等報都統杲進兵襲之三月都統杲出青嶺宗翰出瓢嶺追遼主于鴛鴦濼遼主奔西京宗翰復追至白水濼不及獲其貨寶已巳至西京壬申西京降希尹追遼主于乙室部不及乙亥西京復叛是月遼秦晉國王耶律捏里即位于燕四月辛卯復取西京壬辰遣徒單吳甲高慶裔如宋戊戌都統杲自西京趨白水濼吳勃

極烈昱襲毗室部于鐵呂川爲敵所敗還會察刺兵追至黃水北大破之耶律坦招徠西南諸部西至夏其招討使耶律佛頂降金肅西平二郡漢軍四千餘人叛去耶律坦等襲取之闍母婁室招降天德雲內寧邊東勝等州獲阿疎而還是時山西城邑諸部雖降人心未固遼主保陰山耶律捏里在燕京都統果遣宗望入奏請上臨軍五月辛酉宗望來奏捷百官入賀賜宴歡甚先是獲遼樞密使得里底節度使和尚雅里斯余里野等都統果使阿隣護送赴闕得里底道亡阿隣坐誅耶律捏里遣使請罷兵戊寅使楊勉以書諭捏里使之降謀葛失遣其子蒞泥刮失貢

方物六月戊子朔上親征遼發自上京諸班勃極烈具乞
買監國辛亥詔諭上京官民曰朕順天弔伐已定三京但
以遼主未獲兵不能已今者親征欲由上京路進恐撫定
新民驚疑失業已出自篤密呂其先降後叛逃入險阻者
詔後出首悉免其罪若猶拒命孥戮無赦是月耶律捏里
卒幹魯婁室敗夏人於野谷七月甲子詔諸將無得遠迎
以廢軍務乙丑上京漢人毛八十率二千餘戶降因命領
之丙寅以幹荅剌招降者衆命領八千戶以忽薛副之壬
午希尹以阿疎見杖而釋之八月己丑次駕鵞灤都統杲
率官屬來見癸巳上追遼主于大魚灤昱宗望追及遼主

于石輦鐸與戰敗之遼主遁己亥次居延北辛丑中京將
完顏渾黜敗契丹奚漢六萬于高州李董麻吉死之得里
得滿部降昱宗望追遼主于烏里質鐸不及九月庚申次
草濼閣母平中京部族之先叛者及招撫沁海郡縣節度
使耶律慎思領諸部入內地乙丑詔六部奚曰汝等既降
復叛扇誘衆心罪在不赦尚以歸附日淺恐綏懷之道有
所未孚故復令招諭若能速降當釋其罪官皆仍舊歸化
州降戊辰次歸化州甲戌宗雄薨丁丑奉聖州降十月丙
戌朔次奉聖州詔曰朕屢勅將臣安輯懷附無或侵擾然
愚民無知尚多逃匿山林即欲加兵深所不忍今其逃散

人民罪無輕重咸與矜免有能率衆歸附者授之世官或
奴婢先其主降並釋爲良其布告之使諭朕意蔚州降庚
寅余覩等遺蔚州降臣翟昭彥徐興田慶來見命昭彥慶
皆爲刺史與爲團練使詔曰比以幽薊一方招之不服今
欲帥師以往故先安撫山西諸部汝等旣已懷服宜加撫
存官民未附已前罪無輕重及係官逋負皆與釋免諸官
各遷叙之丁酉蔚州翟昭彥田慶殺知州事蕭觀寧等以
叛丙午復降十一月詔諭燕京官民王師所至降者赦其
罪官皆仍舊十二月上伐燕京宗望率兵七千先之迪古
乃出得勝口銀术哥出居庸關婁室爲左翼婆盧火爲右

翼取居庸關丁亥次嬀州戊子次居庸關庚寅遼統軍都
監高六等來送款上至燕京入自南門使銀木哥婁室陣
于城上乃次于城南遼知樞密院左公弓虞仲文樞密使
曹勇義副使張彥忠參知政事康公弼僉書劉彥宗奉表
降辛卯遼百官詣軍門叩頭請罪詔一切釋之王辰上御
德勝殿羣臣稱賀甲午命左公弓等撫定燕京諸州縣詔
西京官吏曰乃者師至燕都已皆撫定唯蕭妃與官屬數
人遁去已發兵追襲或至彼路可執以來黃龍府叛宗輔
討平之

七年正月丁巳遼奚王回鹘保僭稱帝甲子遼平州節度

使時立愛降詔曲赦平州又詔諸班勃極烈曰比遣昂徙諸部民人于嶺東而昂悖戾騷動煩擾致多怨叛其違命失衆當實重典若或有疑禁錮以待庚午詔中京都統幹論曰聞卿撫定人民各安其業朕甚嘉之回鹘保聚徒逆命汝宜計畫無使滋蔓壬申詔招諭回鹘保癸酉以時立愛言招撫諸部已卯宋使來議燕京西京地庚辰宜錦乾顯成川豪懿等州皆降甲申詔曰諸州部族歸附日淺民心未寧今農事將興可遣分諭典兵之官無縱軍士動擾人民以廢農業二月乙酉朔命撒八詔諭興中府降之遼東州節度使田顯隱州刺史杜師回遷州刺史高永福潤

州刺史張成皆降壬辰詔諸版勃極烈曰郡縣今皆撫定
有逃散未降者已釋其罪更宜招諭之前後起遷戶民去
鄉未久豈無懷土之心可令所在有司深加存恤毋輒有
騷動衣食不足者官賑貸之癸巳詔曰頃因兵事未息諸
路關津絕其往來今天下一家若仍禁之非所以便民也
自今顯咸東京等路往來聽從其便其間被虜及鬻身者
並許自贖爲良仍令馳驛布告興中宜州復叛宋使趙良
嗣來請加歲幣以代燕稅及議畫疆與遣使賀正旦生辰
置權場交易并計議西京等事癸卯銀术哥鐸刺如宋乙
巳詔都統杲曰新附之民有材能者可錄用之戊申詔平

州官與宋使同分割所與燕京六州之地癸丑大赦是月
改平州爲南京以張覺爲留守三月甲寅朔將誅昂以習
不失諫杖之七十仍拘泰州戊午都統杲等言耶律麻括
余覲吳十鐸刺等謀叛宜早圖之上召余覲從容謂之曰
朕得天下皆我君臣同心同德以成大功固非汝等之力
今聞汝等謀叛若誠然耶必須鞍馬甲冑器械之屬當悉
付汝朕不食言若再爲我擒無望免死欲留事朕無懷異
志吾不汝疑余覲皆戰慄不能對命杖鐸刺七十餘並釋
之宋使盧益趙良嗣馬宏以國書來四月丁亥遣幹魯宗
望襲遼主于陰山壬辰復書于宋師初入燕遼兵復犯奉

聖州林牙大石壁龍門東二十五里都統幹魯聞之遣照
立婁室馬和尚等率兵討之生獲大石悉降其衆癸巳詔
曰自今軍事若皆中覆不無留滯應此路事務中都統司
餘皆取決樞密院契丹九斤飛黨與中府作亂擒之九斤
自殺命習古乃漢盧火監護長勝軍及燕京豪族工匠由
松亭關徙之內地己亥次儒州幹魯宗望等襲遼權六院
司喝高質于白水濼獲之其宗屬秦王許王等十五人降
聞遼主留輜重青塚以兵萬人往應州遣照里背答宗望
婁室銀术哥等追襲之宗望追及遼主決戰大敗之獲其
子趙王習泥烈及傳國璽五月甲寅南京留守張覺據城

叛丙寅次野狐嶺己巳次落藜灤韓魯等以趙王習泥烈
林牙大石駙馬乳奴等來獻并上所獲國璽宗雋以所俘
遼主子秦王許王女與野等來見奚路都統撻懶攻速古
噉里鐵尼所部十三巖皆平之又遣奚馬和尚攻下品達
魯古并五院司諸部執其節度乙列回离保爲其下所殺
辛巳詔諭南京官民六月壬午朔次鴛鴦灤是日闍母敗
張覺于營州丙申上不豫將還上京命移賚勃極烈宗翰
爲都統吳勃極烈昱迭勃極烈韓魯副之駐兵雲中以備
邊己酉次斡獨山驛召諳班勃極烈吳乞買七月辛酉次
牛山宗翰還軍中八月辛巳朔日有食之乙未次渾河北

諳班勃極烈吳乙買率宗室百官上謁戊申上崩于郕堵
樂西行宮年五十六九月癸丑梓宮至上京乙卯葬宮城
西南寧神殿丙辰諳班勃極烈即皇帝位天會三年三月
上尊謚曰武元皇帝廟號太祖立原廟于西京天會十三
年二月辛酉改葬和陵立開天啓祚睿德神功之碑于燕
京城南嘗所駐蹕之地皇統四年改和陵曰睿陵五年十
月增謚應乾興運昭德定功睿神莊孝仁明大聖武元皇
帝貞元三年十一月改葬于大房山仍號睿陵

贊曰太祖英謨叡略豁達大度知人善任人樂爲用世祖
陰有取遼之志是以兄弟相授傳及康宗遂及太祖臨終

以太祖屬穆宗其素志蓋如是也初定東京即除去遼法
減省租稅用本國制度遼主播越宋納歲幣以幽薊武朔
等州與宋而置南京于平州宋人終不能守燕代卒之遼
主見獲宋主被執雖功成于天會間而規摹運爲實自此
始金有天下百十有九年太祖數年之間筭無遺策兵無
留行底定大業傳之子孫嗚呼雄哉

本紀第二